

Aalisarnermut atatillugu atuisunut akiliuteqartitsineq pillugu Namminersorlutik Oqr-tussat nalunaarutaat

Aalisarneq pillugu Inatsisartut Inatsisaanni nr. 18, 31.oktober 1996-imeersumi § 14-a aamma § 33 imm. 2, kingullermik Inatsisartut Inatsisaanni nr. 12, 3. december 2012-meersumi allanngortinneqartoq, tunngavigalugit aalajangersarneqarpoq:

Atuuffia

§ 1. Nalunaarummi aalisarnermut atatillugu atuisunut akiliuteqartitsinerup malittarisassiunneqarpoq.

Imm. 2. Atuinermut akiliuteqartussaatitaaneq atuutsinnejarpoq umiatsiaaqqat, aalisariutit imaluunniit aalisartitseqatigiiffit Kalaallit Nunaanni angerlarsimaffeqartut atorlugit aalisarnermi.

Akiliisarneq akiliuteqarnissamullu piffissarititaassut

§ 2. Avataasiorluni aalisarsinnaanermut imaluunniit sinerissap qanittuani rajaarniarsinnaanermi akuersissutit pisassiissutit amerlassusaat tunngavigalugit akilerneqartassapput. Pisassiissutit nalunaarutigineqartut tonsimut ataatsimut 60,00 koruuninik akilersillugit akilerneqartassapput. Pisassiisutit akilerneqareersut pisarineqangnitsulli utertinnejqarsinnaanngillat.

Imm. 2. Imm. 1 naapertorlugu akiliutissat ukiumi pisassiiffiusumi januarip aallaqqaataani akilerneqarsimassapput. Akiliiffissaq kingullerpaaq tassaavoq ukiumi pisassiiffiusumi aprilip aallaqqaataa.

Imm. 3. Pisassiisutit januarip aallaqqaataata kingorna nalunaarutigineqarpata qaammatisiutit ukiuannut ataatsimut atugassiissutaappata, akiliutissat ullormi nalunaarfiusumi akilerneqartassapput, kingusinnerpaamillu nalunaarutigineqarneraniit qaammatit pingasut qaangiunnerini akilerneqareersimassallutik.

Imm. 4. Ulloq akiliiffissaq kingulleq, takujuk imm. 2, sapaataappat, ulloq nalliuttorsiorfiuppat arfinningorneruppalluunniit akiliiffissaq kingulleq ullormut tullinnguuttumut nalinginnaasumut sivitsorneqassaaq.

§ 3. Aalisarsinnaanermut akuersissutinik tunniussinermi aamma sinerissap qanittuani aalisarsinnaanermut akuersissutinik tunniussinermi, taamaattorli tassani ilangunneqanngilaq sinerissap qanittuani rajaarniarneq, 1.500,00 koruuninik akiliisoqartassaaq.

Imm. 2. Imm. 1 naapertorlugu akiliutissat ullormi nalunaarfiusumi akilerneqartassapput. Ulloq akiliuteqarfissatut nalunaarutigineqartoq naapertorlugu akiliisoqanngippat akiligassat akiliuteqarfissatut killissarititamiit qaammatit pingasut qaangiutsinnagit kingusinnerpaamik akilerneqareersimassapput.

Imm. 3. Ulloq akiliiffissaq kingulleq, takujuk imm. 2, sapaataappat ulloq nalliuttorsiorfiuppat arfinningorneruppalluunniit akiliiffissaq kingulleq ullormut tullinnguuttumut nalinginnaasumut sivitsorneqassaaq.

Umiatsiaararsorluni aalisartunut akiliuteqartitsisarneq

§ 4. Umiatsiaaraq paasineqassaaq imatut, angallat tamakkerluni 6 meterinik (l.o.a.) angissusilik tassanngaluunniit mikinerusoq.

Imm. 2. Umiatsiaararsorlutik aalisartut aalisarsinnaanermut akuerineqarnissamut siullermut atatillugu taamaallaat akilummik akiliuteqassapput, takujuk § 3 imm. 1. Umiatsiaararsorluni aalisartoq aalisarsinnaanermut akuersissummut siullermut akiliuteqareersimasoq, aalisakkanik allanik aalisarsinnaanermut akuersissummit pissarserusuppat, aalisarsinnaanermut akuersissutit taakku tunniunneqassapput akiliuteqartitsinertaqanngitsumik.

Ullut aalisarfiusut aallaavigalugit aalisarnermik ingerlatsineq

§ 5. Avataasiorluni aalisartunut ullut aalisarfiusut aallaavigalugit aalisarnermik ingerlatsisunut akiliutissatut nalunaarutigineqartut tulaanneqartut tunngavigalugit naatsorsorneqartarput. 60,00 koruunit tonsimut akilerneqartassapput.

Imm. 2. Imm. 1 naapertorlugu akiliutissat aalisarnerup uninneraniit qaammatip ataatsip qaangiunnerani akiligassanngortinneqassapput. Akiliutissat kingusinnerpaamik akilerneqarsimassapput akiliiffissap nalunaarutigineqarneraniit qaammatip ataatsip qaangiunnerini.

Imm. 3. Ulloq akiliiffissaq kingulleq, takujuk imm. 2, sapaataappat, ulloq nalliuottorsiorfiuppat arfinningorneruppalluunniit akiliiffissaq kingulleq ullormut tullinnguuttumut nalinginnaasumut sivitsorneqassaaq.

Akiliisussaatitaaneq

§ 6. § 2 naapertorlugu akiligassaq akilerneqartussaq, januarip aallaqqataani pisassiissutinik nalunaaruteqarfigineqartumit akilerneqarsimassaaq. Qaammatisiutit ukiuata ingerlanerani pisassiissutit nalunaarutigineqarpata, qaammatisiutip ukiuata sinnerani akiligassat, inummit imaluunniit suliffeqarfimmit pisassinneqartumit akilerneqartassapput.

Imm. 2. Pisassiisutit ilaat tamakkerlugilluunniit allamut tunniunneqarpata, qaammatisiutit ukiuata pineqartup ingerlanerani akiliiffissaatitaasup ingerlanerani akiligassanik tunniussisoq akiliisussaatitaavoq.

Imm. 3. Akiliisinnaajunnaarnerup, pinngitsaaliisummik tunisaqartariaqarnermi, aningaasatigut ajornartoornermi assigaaniluunniit pisoqartillugu inuussutissarsiummik unitsitsisariaqarnermi pisassiissutinik tunniussinermi akiligassamik akiliisussaatitaaneq suliffeqarfimmit pisassiissutinik pissarsisumit akisussaaffigineqassaaq.

Misileraalluni aalisarneq

§ 7. Avataasiorluni misileraalluni aalisarnermi akiliutissat, pisarisimasaviit aallaavigalugit naatsorsorneqartassapput. Pisat tonsikkaartumik akilerneqartassapput, akiliutissallu 60,00 koruuniupput tonsimut.

Imm. 2. Imm. 1 naapertorlugu akiliutissat ukiup aalisarfiusup tulliani januarip aallaqqataani akilerneqarsimassapput, akiliiffissarlu kingullerpaaq tassaavoq ukiup aalisarfiusup tulliani aprilip aallaqqataa.

Imm. 3. Ulloq akiliiffissaq kingulleq, takujuk imm. 2, sapaataappat ulloq nalliuottorsiorfiuppat arfinningorneruppalluunniit akiliiffissaq kingulleq ullormut tullinnguuttumut nalinginnaasumut

sivitsorneqassaaq.

Imm. 4. Misileraalluni aalisarnermi akiliutissamik tamakkiisumik ilaannakortumilluunniit Naalakkersuisut akiliinissamut pisussajunnaartitsisinnaapput. Akiliinnginnissaq allakkatigut nalunaarutigineqassaaq.

Akiliuteqannginneq

§ 8. Inuk suliffeqarfilluunniit akiliutissamik piffissaq eqqorlugu akiliuteqarsimanngitsoq, Aalisarnermut Piniarnermut Nunalerinermullu Naalakkersuisoqarfimmit akiliuteqarnissaminut nutaamik piffissaliiffigineqarsinnaavoq.

Imm. 2. Akiligassat ernialerneqartussaapput ernialersitsinermut inatsisit malillugu.

Imm 3. Akiliisimannginermi, qinuteqartoq Aalisarnermut Inatsit tunngavigalugu akuersissummik imaluunniit licensimik nutaamik tunineqarsinnaanngilaq, aatsaallu tunineqarsinnaalluni, akiligassaq, ilanngullugit morarenter, akilerneqareerpata

Pineqaatissinneqarsinnaanerit

§ 9. § 8 naapertorlugu piffissaq eqqorlugu akileeqquneqarsimagaluartut piaaralutik mianersuaalliorujussuarnikkulluunniit akiliisimanngitsut akiliisinneqarsinnaapput.

Imm. 2. imm 1 naapertorlugu akiliisitsinernit isertitat Nunatta Karsianut nakkartinneqartassapput.

Atuutilersinneqarnera

§ 10. Nalunaarut ulloq 1. januar 2013-imi atuutilissaaq. Tamatumunnga atatillugu, Aalisarnermut atatillugu atuisunut akiliuteqartitsinermut Namminersorlutik Oqartussat nalunaarutaat nr. 2, 12. februar 2010-imeersoq, atorunnaarsinneqarpoq.

Namminersorlutik Oqartussat, ulloq 21. december 2012

Ane Hansen

/

Jens K. Lyberth

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut